

honsell, uniud

**CIRF**

## I sporteliscj: «Ricors al Tar»

**A**VAN INDEVANT lis protestis dai operadôrs dai sportei linguistics cuintri il bant di concors fat de Universitât di Udin pe assunzion di un dipendent aministratîf li dal Centri interdipartimentâl di ricercje su la culture e la lenghe dal Friûl, daspò lis declarazions ae Vite Catoliche di Piera Rizzolatti, direttore dal Cirf. Cumò, a disin i sporteliscj in tun comunicât stampe, «o stin cjapant in considerazion la idee di un ricors eventûal al Tar».

Dut al scomence ai 12 di Març cu la publicazion sul sît

internet dal Ateneu dal bant di concors, che, pai sporteliscj, al presentave dai «vizi di forme», tant che, ai 20 di Març, chescj a àn consegnât al retôr Furio Honsell e al diretôr aministratîf Daniele Livon une letare, sottoscrite di 36 di lôr, par domandâ la modifiche dal bant. No vint vût une rispueste formâl, i firmataris a àn decidût di presentâ istès domande di concors ancje cence vè lis carateristichis domandadis tal bant. Ae Vite Catoliche Rizzolatti e à dit che «al è stât un malintindût», che «il bant al jere dreçât ae selezion di un aministratîf cun

competencis plurimis» e che l'Universitât e sta lavorant a un gnûf concors par assumi un sportelist, che al sarès saltât fûr dentri di 15/20 dis (l'interviste e je dade fûr sul numar di sabide ai 7 di Avrîl, ndr).

Secont i sporteliscj «l'Universitât no rispuint jentrant, come che e varès, tal mert des incongruencis dal bant, e si contradis ufrint publichementri ai sporteliscj une gnove pussibilitât: un gnûf concors "ad hoc". E ancjemò, «lis unichis declarazions uffiâls rivadis dal Ateneu a mostrin dute l'incoerence e la superficialitât che e

je stade gjestide la situazion interie a scomençâ de elaborazion stes dal bant».

Parcè po, si domandin, «se l'Ateneu nol à nuie di rispindi aes contestazions dai sporteliscj», il diretôr aministratîf al varès di valutâ l'amission des domandis di chei cence ducj i recuisîts domandâts dal bant, tant che e dis Rizzolatti?

I operadôrs dai sportei linguistics – che, a zontin, «dal Ateneu si saressin spietâts une modifiche imediade dal bant» – cumò a stan valutant ce fâ, ancje ricori al Tar.

**E.A.**